

# Kerweredd 2008

## Einleitung:

Hallo ehr lieve Kerwegeschk !!!,  
(Pause)

Sinn ihr ach all do?

Des is Recht!

Aus Lautre hän se mich herbestellt,  
-Im Herze immer Weiddethalern-  
halt ich fer uns, die wichtigscht Redd uff de Welt

In Berlin, de Barrack Obama hot ghalte soi Redd,  
ich glaab, des kann ich besser, do halt ich jede Wett!

Letscht Jahr war jo alles ausgefallen, ich glaab wesche de fehlende Luscht,  
dass Jahr hemmer wieder alles, vorbei all der Kerwe-Fruscht.

Im Vorjahr gabs a kaum was zu berichten,  
awwer dass Jahr gebt's schunn e paar Schmunzelgeschichte.

Ich will Eich nett länger uff die Folter spanne,  
unn mol ganz locker vunn vorne mit de Redd ofonge

## **Kapitel 1: Die Blumenfreundin**

Unser herzensgutschdie Fraa, die Irene M., war 80. dess Johr,  
Geschenke gabs, unner annerem e Blummegsteck defor.

Nooch der Feier gings ab in de Schwarzwald-Urlaub noi,  
unn debei die Blumme vergesse, dess darf doch nett soi.

Nooch de Hämkehr dann, strahlt´s Irene,  
dess Gsteck war noch nett kaputt, dess Scheene.

Sofort hotts die Mutter Theresa mit Wasser gegosse,  
und e paar Freudeträne sinn dobei a noch gflosse.

E nochmolisches Donkschä, telefonisch an die Schenkerin,  
brocht die Wohret ans Licht, unn ich glaab ich spinn

Die Bliethepracht hebt laut Beschreibung, mindestens eh ganzes Jahr,  
warum wohl?, weil dess scheene Blummegsteck aus Plastik war !!!

## **Kapitel 2: Paulchen Panther und die Wassermassen**

Im August hotte mer e großes Uhwetter bei extremer Hitz,  
geräht, gehagelt, gedunnert hotts, unn a noch geblitzt.

Viel Brieh unn riesische Hagelkörner sinn vunn owwe blitzartisch runnerkumme,  
**beim Schreiner Fuder hännse schunn mim Bau vunn de Arche Noah begunne !!**

Die Fußballer sinn plötzlich als Wasserballer gschwumme,  
unn de Kanal hot die Wassermasse a nimmie uffgenumme.

So mancher Weidedahler hott plötzlich frei fließend Wasser im Haus,  
unn denkt driwwer noch, wie krieh ich dess blos wieder raus.

Fer mich überraschend, dass die große Bosse käh neie Wassergebühr dun erhebe,  
**weil alles andere wie Strom Gas Abwasser dut doch a ohne Ende noh owwe strebe !!**

Unser Paulche ganz clever hot sich a nett geziert,  
und des Wasser iwwer soin Luftschacht ins Haus noi gefiehr.

Nett nur technisch beschlache, denn s´iss jo kenn Bleeder,  
des Wasser muss mer ordentlich oileite, dess wäs doch Jeder.

Drumm hott er e Oirichtung gebaut, die er sich patentiere lies,  
**damit des Wasser im Schuss vumm Lichtschacht direkt in die Wohnung fließt !!**

En Entlüftungsschlauch vumm Trockner in de Lichtschacht, so soi Geischesblitz,  
damit die Brieh durch de Schlauch unn de Trockner in die Wohnung noi flitzt.

Ein Mordsstrahl iss aussem Trockner gschosse,  
unn de Paul fangts mit de Kanne uff, dess sinn kää Bosse.

Ich wäs jetzt bloß net, nemmt er des Wasser nur zum Gieße vumm Gaarde,  
**oder dut er, un soi Rosi sogar samsdachs gemeinsam drinn baade ???**

### Kapitel 3: Die unendliche Geschichte

Jetzt muss ich Eich was net gonz neies Berichte,  
die Storrie häßt, die unendliche Gschichte.

Jeder wääs was jetzt kummt, manche liehschen vor lache schunn flach,  
de neije Bahnübergang nooch Weidenthal Ost, in die Weißebach !!

Vor e paar Woche war dess in de Rhoipalz zu lese,  
ich mähn heit noch, dess wär en Alptraum gewese,  
ferr die Weiddedahler hinner de Schronke kää Wonne,  
**Zwädausendelf werrd frihschtens mit dem Bau begonne !!**

Vor acht Johr, hott de Gemäänerat die Planung beschlosse,  
die Planfeststellung iss oigeleit, hott die Bahn mehrfach mitteile losse

Vor zwää Johr hott sich dann rausgestellt mit Krause,  
s'iss noch garnix bassiert in de Bahn erhm Hause.

De Gemähnerat muss nochmol beschließe den BÜ-beseitigungsplan,  
dess treibt die Mensche hinner de Stong weidder in de Wahn.  
Doch nett genuch dunn die Arme dann a noch weiter zsammezucke,  
**jetzt missen die Gutachter e Johr long noch noh denne seltene Blume gucke !!**

Debei ließ merr de ganze Hang vor Johre schunn räume,  
vunn jeglichem Aufwuchs, Hecken und Bäume.

Unn dann wurd e Johr lang driwwer gewacht,  
wie dess heimische Unkraut zum Lewe erwacht.

Seit merr nett bähns, awwer die henn doch all enn Schuss,  
**Fongen endlich on, unn heren mit dem Dummbabble uff !!**

#### **Kapitel 4: Die fixe Idee**

Ehr Leit de Himberg iss e steiles Stick,  
ich wohn nett dort, wass e Glick.

Die wo ganz owwe wohnen, ehr mähnen dess wär schäää,  
brauchten demletzt die Hilf vunn unsrer Gemääh.

En Öltanker kummt nämlich nimmie nuff, weil de Weg iss so schlecht,  
do froochen die Leit unsern Paul, ob die Gemääh denn net mol mache mecht.

Doch unser Chef iss jot nett bleed,  
erklärt de Himberger wie dess halt geht.

„Traachens doch in Ämer de Himberg nuff bis uff die Höh“,  
de LKW-Fahrer denkt, dess is awwer schääh,

Er lest soi Zeitung in seinem Öllieferwaache,  
währenddesse die Himberger es Ehl de Berg nuff traache.

So iss unser Boiemeschder, schnell und net faul,  
**kostegünstische Lösungen immer parat, unser Paul !!!**

## Kapitel 5: 11 Freunde müsst ihr sein

Am 9.8. vunn morgens um zehn bis mittachs um vier,  
war beim Tennisclub ferr Ofänger e Schnupperturnier,

Unne hennse gspielt, unn gekämpft uffem Tennisacker,  
die meischde devunn warn Aktive vumm Wacker.

Owwe warn die Zuschauer unn die Berater gsesse,  
henn einisches getrunke unn Spießbrote gfresse.

Die Manager mit Sunnebrill wirkten mit jedem Wääze cooler,  
sowie de Laubscher Christian unn de Sven Schuler.

De Sven hot noch e bissel was getrunke unn bis Nachts diskutiert,  
unn sich oschließend Richtung Geburtsdaach vumm Löchner Oli orientiert

Eigentlich hetts gelangt, awwer sis halt immer scheener,  
de Abschluß zu mache, beim Lieblingstrainer.

Allähh wollt er nett gehe und hott bald noch zwee gfunne,  
**de Pralle unn de Marx als Bodyguards mitgenumme !!**

In de Wackerhall hott de Sven mim klää Jenne weiter diskutiert,  
unn gar net gemerkt, dass bei dem die Stimmung oifriert,

zum gute Schluss hott de Svennie donn nix meeh zu lache,  
**dut doch de Klää Jenne ihm uff soi Aaach druffschlaache !!!**

Sofort kummt de Notarzt unn sieht im Sven soi Wunde,  
ab zum Nähe noh Neistadt, k.o. in der ersten Runde,  
Unn wo warn die Bodyguards vumm Schuler-Buuh ?,  
**enner hot sich geduckt unn de anner sucht im Gras soi Ruh !!!!!**

Muss mer sich in de gleich Mannschaft eigentlich vumm Kollesch verschlache losse ?,  
Weje weitaus klännere Sache hennse in de B-Klass die Türke vumm Fußball ausgeschlosse.  
Jenne unn Schuler, Freunde ferrs Leewe oder nur zum Schoi,  
**ich sach Eich nur: 11 Freunde missener soi !!!!**

## Kapitel 6: Goldene Dacherl

Unser Sporthall se unnerhalte, dess koscht Geld,  
un weils nix Wichtigeres gebt uff dere Welt,

do wern mol schnell die Balke vumm Dach repariert,  
praktisch um vorsebeuge, dass do jo nix bassiert.

Die Hall werd gesperrt unn de Betrieb oigstellt,  
ich glaab dess war einmalisch uff däre Welt.

Dann befasst sich de Bauausschuss mit dere Sach,  
ehr liewe Turner häßt´s: halte de Balle flach.

Donn kummt en Architekt der braucht a soi Zeit,  
wieder iss die Eröffnung noch unendlich weit.

Schließlich werd a noch enn Statiker oigebunde,  
der muss unnersuche de Leimbinder ehr Wunde.

Probebohrunge im Holz saachen uns dann,  
dass dess alles nett so schlimm so kann.

Doch jetzt simmer debei unn iss a kääh Wunner,  
**jetzt missen die Panele vunn de Deck noch runner !!**

Die Risslein werren vergosse unn krätissch geklebt,  
do bassiert nix mäh, selbscht wann mol die Erd bebt.

Alle Beteilichte hann wohl im Stille de selwe Gedanke,  
dass dess Dach ach ohne den Uffwand dut net wanke,

Awwer um nachts gut schloofe zu känne,  
wurd dess gemacht, s´iss faschd zum flänne.

Nach einische Woche, näh Monate muss merr saache,  
wars endlich fertisch unn die Gemäh dut so noch spare,  
denn mit noch e paar Gutachte vunn Kennern, unn dess misst ehr wisse,  
**hette merr faschd die gonz Turnhall zur Sicherheit abreiße misse !!!!**

## **Kapitel 7: Mittwochs trinke mer nix**

Es gebt e neiji Wannerguppe gemeldet beim Verband in Speyer,  
sie häßt Ü60 – Mittwochs trinke mer nix- unn kummt vumm Weiher.  
Knallharte Toure meistens zu de schenschte Hitte in unserer Palz,  
**sie laafen noch schneller als domols vunn de Poschd de Falz !!**

Ferr Einische vunn därre tolle Wunnertrupp,  
gilt Mittwochs käh Sprit, hegschtens Erbsesupp.  
Kä Bier, kä Schorle unn a kenn Klare,  
denn mindestens zwee von zehn missen Häm noch fahre.  
Verwunderlich nur, owends kennen se kaum laafe unn spreche,  
**teilweise mehnt merr hoppla, die missen joh glei breche !!**

Ein Rätsel dess demnächst in Galileo uff Pro 7 werdd unnersucht,  
sinn die beiden Fahrer vielleicht vumm Wannergeischt verflucht ?  
Ich wääs was do so Mysteriöses immer Mittwochs passiert,  
**es wurd schunn gesehe, wie de Mann de Fiedler hämfiehr !!!.**

Doch aach die Annere vumm Team der durstischen Truppe,  
wie zum Beispiel de Rossi Senior lieben net nur die Erbsensuppe,  
des Rätsels Lösung dess is klar und gemeldet beim Verband in Speyer,  
**sinn pro Mann zum Abschluss zeeh Wäaze im Badeweiher !!!**

## **Kapitel 8:** Dorf der schänschte Ruine der Welt

Eigentlich sinn Ruine was historisches, doch ferr Weiddedahl e Problem,  
kummscht mit dem Zug an unserm Bahnhof on, willscht glei wieder häm.  
denn gugscht emol niwwer, uff die onner Seit vumm Dahl,  
**stehn die Krügerschen Steine, die alte Skeiline von Weiddedahl !!**

E Osicht wie noch em Kriesch werrd em do gebote,  
**ich glaab merr sinn uns änisch, dess ghert verbote !!!!**

Um weitere Geschichte und Kultur hier zu erlewe,  
missen die Tourische sich nur Richtung Lambrecht begeben.  
En kurz Walk, siss glei vorbei,  
trifft man auf Ruine Nummer Zwei.  
Beim Stumpe Hoinz hoscht einst gut gesse,  
doch dieses Haus konnscht heit a vergesse,  
Gasthaus Erb, dess waren noch Zeite,  
**doch heit dut uns um die Barrack kenner beneide !!**

Dess war jo schunn domols allen klar unn bekannt,  
hott mer denn Schuppe zum Schluss Laschd Eksit genannt,  
Lädschder Ausgang so häßts in deitsch unn hott misse so kumme,  
denn der letschte Besitzer hott a iwwer Nacht Ausreiß genumme,  
Heit ghert dess verlossene Haus de Banke, was solle mern mache?  
dess steht jo in Weiddedahl losse mer unsern Pleitegeier driwwer wache.  
kää Schwein kimmert sich meer drumm, es geht weiter nunner,  
**Gott steh uns bei !!! Schick a Abrißbirn runner !!**

Leider, ehr Leit, s´iss noch net vorbei,  
im Owwerdorf steht Ruine Nummer Drei !  
Seit Johre bekannt im ganzen Land,  
iss dess 3 Schissel-Haus e wahrie Schand !  
Bei de Kreisverwaltung geführt unner Akte X,  
**awwer gemacht werrd dort seit Jahren nix !!**

Unser Hauptstroß verkommt ball zur lebenden Geschichte,  
ich kennt noch vunn weitere abrisshistorische Gebäude berichte,  
awwer die Storrie will ich friedlich beende, denn auch ich bin weise,  
s´gebt a gepflegte historische Stätte, ich muss bloß uffs Keppl hinweise.  
denn wie in Schottland, hemmer e Denkmal aus Stein, weltweit bekannt,  
schunn vor Johre vunn de Nachtschwärmer **zum STONEHANS** benannt.  
Ferr Nichtwannerer unn lauffaule Partyjungs iss dess dess WAHRE,  
kannscht nämlich mimm 3er BMW unn nem Motorrad bis vornie hie fahre.  
Raucherkneipe unn rund um die Uhr iss beim STONEHANS uff,  
drumm machen die Buwe monchmol bis morjens enner druff,  
ehr liewe Leit, die viele STONEHANS-Besucher do owwe, die mache merr Kummer,  
**hoffentlich kummen die Götter der Nacht wenigstens mol an de Kerwe runner !**

## **Kapitel 9: SIS - Mim Rädche durch de finschtere Wald**

Vor e paar Woche, do war was los im Stuhlfauth soim Wald,  
ball 500 ausgflippte Radler triebens: Hart, Dunkel und Kalt.  
De Chef vunn de Nachträdcher, wohnt do hinne, vunn do garnett weit,  
Herrmann D. vunn de Bank, unner de Woch Dr. Jekyll unn bei SIS Mister Heidt.  
SIS steht ferr Schlaflos im Sattel unn dass ess jetzt a jeder wääs,  
mim NASA-Rädche durch die Nacht bei em bis maximal zwä PS.  
Im moderne Internet schunn längscht e Top-Event,  
henns doch einische a vunn Eich do unne glatt verpennt,  
Verpennt henn a einische Fahrer de richtische Weg mit ehrm Rad,  
**e gebrocheni Schulter und e zertrümmertes Becke warns Resultat !!**

Monchmal wars wie bei die Formel Änss,  
bloß e Säftiecar hotten se halt noch kääns.  
30 Minute bis zirka e halwie Stunn,  
dann warn die Beschte emol im Kreis erumm.  
e haufe Kraft in die Bää und monche a mit Hirn,  
Mit Lämpcher am Lenker **unn** a on de Birn !!!!  
Bei dem Spektakel war kää Wildsau mäh in ehrm Waldversteck,  
awwer die sinn jo sowieso seit langem **in de Gärte vumm Langeck !!**

Ferr die knallharte Racer gabs Freidaachs e Happy-Meddel-Konzert,  
do henn die Schwermetaller namens Schlammbein rummgeblärrt.  
mim Kopp wackle, die Leit rumstubbe unn dann noch die laute Verstärker,  
awwers schenschte die **durchtrainierte, leckere Kerlcher mit Bilder am gonze Kerper !!!**  
Trotz allem war des Schlaflos im Sattel e Riesesach,  
wanns aach ab und zo mol gewwe hot e bissel Krach,  
Schuld war e neie Gratis-Strosse-Wertschaft eines tatkräftigen Mannes,  
**die Gläser hoch uff de Langetaler Fanclub „Zum Wieser Hannes“!!!!**

Unn unser Paul de Chef vunn doh, mal warer devor, manchmol degehe,  
Paul fass der Herz und du zu dem riesische Spektakel stehe,  
geh als Vorbild voran unn geb der selbst mol e Tritt,  
**unn fahr 2009 als Mountainbiker a emol mit !!!!**

## **Kapitel 10: Die harten Jungs**

Vereine hemmer genuch und dess stimmt uns froh,  
doch plötzlich iss dess Jahr noch e neie Trupp do,  
In Weiddedahl unn weltweit iss dess de Schocker,  
**die knallharte Jungs, kurz die Stääbruch-Rocker !!!**

Ich habs zweemol gelese und denk als noch weiter,  
wass issn dess, die Weiddedahler Hardcore-Rider ??  
Im Internet verdriickt ? ich war noch am streite,  
weil mit dem Name ? eine teure Porno-Seite ?  
Doch weit gefehlt, dess stimmt, unn ich läs noch des onnere Drittel,  
**dess sinn die Jungs die merr kennen,  
wie de Sigg, die Kuh unn de Schittel !!!!**

Klickt merr im Internet denne ehr Homepage an,  
kriecht mer sofort Angscht vorm Tote-Schädel-Mann,  
Unn weiter lääst mer kein MC und kein MF,  
**Hardcore-Jungs was issn dess ?  
Ich hab enner gfroht, denn ich gut kenn,  
der hott mer gsaht, dess iss härter wie SM.**

Ich hab die Seit donn mal genauer ohgeguckt,  
unn bin bei ehm Neimitglied zsammgezuckt,  
ich konns faschd net glaawe und kreisch ganz laut hui,  
**dess Mitglied iss de Poschtler: Ackermann Lui !!!**

En alter Poschtler als Motorrad-Rocker der Nacht,  
do hab ich awwer mol ganz schee laut gelacht,  
do hab ich sofort e geiles Bild in moim Kopp,  
**de Lui un soi Friedsche uffm große Harley-Bock !!!**

Doch halt, es hott sich alles uffgelöst: Gott sei Dank, Amen,  
**denn der richtische Rocker hot a nur de gleiche Namen !!**

Der Verein hott awwer Zukunft, iss nei, unn ich findne klasse,  
ich glaab ich will a zu de Känische der mehr als ¼ Liter Klasse,  
Allääh trau ich mich do awwer noch nett hie zum stemme,  
deshalb werr ich merr noch unsern Boiemeschder mitnemme.  
Mitglied Nummer 100 nohm Pabscht werd donn unsern Paul,  
**hott er erscht e Maschin, häßts de „Paul unn soin Gaul“ !!!**

## Kapitel 11: Autofahrer zweiter Klasse

In Lambrecht hennse die Stroße repariert, unn debei a nett gspart,  
die war kaputt, weil se johrelong henn ehr Gääsbeck driwwerjeht,  
E Baustell zum Heile, hennse dort hiegemacht,  
schunn bald hott ganz Deitschland driwwer gelacht.  
Ampelverkehr, Durchfahrtssperre unn a annere Ferz,  
dess schlaht so manchem KFZler schwer uffs Herz.  
doch dess Schärfschte war donn die chaotische Provinz-Bosse,  
**henn se die Weiddedahler unn paar annere nimmie durchgelosse !!**  
s´erschde Protokoll hott donn zum Glick schunn alles getoppt,  
die Bollizei hott de Eschdler Liebling, de Erdel Kurt gstoppt !!  
Wer dess nett wees unn a bisher noch nett verstand,  
**dess iss ausgerechnet de Chef vumm Stroßebauamt !!!!**

De Verkehr hott sich donn iwwer Neidefels bis Weiddedahll uffgstaut,  
weils Straßenbauamt hott e neier Grenzposchde hiigebaut.  
Wer trotzdem ohne zu zucke durch Gäsbocktoun gfahre iss,  
denn hott die Polizei gschnappt, unn de Fiehrierschoi faschd verriss.  
Warum dierfen mir Weiddedahler nett durch, unn so solls a bleiwe,  
alle annere vunn de VG derfens, so en Quatsch dut de Eschdler Kurt entscheide.  
Doch en Onruf vunn moim Boss genügt, unn ich derfs vielleicht nett erzähle,  
**die Stroß war uff, dofür sollen alle Bürger S´Eschdler Kurtsche wieder wähle !!!**

E weiderie Story gonz kurz unn herrlich schääh,  
vumm gestresste Mitarbeiter der Verbandsgemäh,  
Bei de Tonkstell Schäffer stand e große Ampel unn die war roht,  
ferr unsern Herbie Laubscher ä Problem, der war nämlich zu spoht,  
wie kann er noch e bissel Zeit raushole, oder sogar spare,  
iss der doch glatt bei rot iwwer die Ampel driwwer gfahre,  
als er awwer in soim Rickspieschel guckt, schreit er eijejei,  
**direkt hinne droh die Freunde der Verkehrspolizei !!!!**

Er iss zwar noch schnell, unn dess iss net geloge,  
mit ca. 120 kmh in die Bergstroß abgeboge,  
die Polizei hennen vor de VG noch gestoppt und gfroht,  
sachen se mol, fahrn Sie eigentlich immer bei roht ?  
De Herbert uff emol ganz clever unn a nimmie verpennt,  
awwer ich hab doch nur an moi viele Ärwed gedenkt.  
doch dess iss noch nett alles und er fährt fort ganz kess,  
**bei de Gemäh muscht maloche, besonders isch hab viel Stress !!!**

Die Polizei hott Verständnis, ferr den Gschichteerzähler vumm Tal,  
losst enn ohne Brotsche weiterfahre unn dess war phenomenal,  
awwer was bleibt dess hott a mich sehr bedrickt,  
de Stress bei de Gemäh macht den Herbert verrickt,  
ich muss mit dem Chef Bertram mol rede unn der soll donn a nett zicke,  
**unn unsern Herbie halt zum 8te mol dess Jahr in Urlaub schicke !!**

## Kapitel 12: Terminator

Jetzt stell ich Eich etwas Besonderes vor,  
**die Story vumm Weiddedahler Terminator !**

Im Airport Frankfurt was denn Summer gschehe,  
e Weiddedahler Schmugglerin hott merr dort gesehe,  
beim Versuch Pillcher unn Waffe on Bord zu bringe,  
**fongt de Metalldetekor plötzlich on zu spinne !!!**

Alles werrd so wunnerbar,  
de Urlaub uff Gran Canaria,  
de Nome zu nenne, dess iss strengstens verbote,  
**darum du ich die Anita vunns Seithels a nett verrote !!**

Also zuriECK zum Check-in in de Flughafenhalle,  
dut de Polizist schunn die Hand um die Knarre balle,  
denn die Anita laaft zum zweede Mol durch den Metallkaschte,  
**fongt doch die Klingel schunn wieder on auszuraschte !!!**

Sie werd gfroht noh Metall unn annere Waffe,  
ich hab nix mäh on märr, ehr Zollamtsaffe.  
noch emol werdse gscheckt un zu Bode gschmisse,  
dabei werrn die gute Strumpfhose von Triumph verrisse,  
doch die Anita dut noch mol alles genau iwwerdenke,  
**unn schreit, halt ich hab zwää eiserne Kniegelenke !!!**

## Kapitel 5: Miss Rambo und Gehilfen uff Wildschweinjagd

Die Story iss vumm 5. Mai 2008, zwischen Fünfe unn Siewe,  
do henn Wesen aus unserm Wald ehr Unwese getriewwe.  
Fer manche wars luschdich, awwer einische hotten doch großen Ärscher,  
Tatort: die Gärte vunns Laubschers, Kretners, Grammbitters unn Schöneberscher.

Seit Johre und dess iss beim Touristebüro inn Lambrecht erfasst,  
sinn große un kleene Schweinscher im Langecker Paradiesgarte zu Gascht.  
Dess Mol war alles annerscht unn ich glaab ich darfs saache,  
de Klaus unn soi Monie sinn beruhischt in Urlaub gfahre.  
noch Meenung vumm Klaus henn die Sej nun sowieso ausgekichert,  
soi Anwesen **iss nämlich sicherer als Fort Knox gesichert !!!**

Hi-Tek-Onlache, Stacheldrooht unn hohe Maure zum Schutze beim Klaus,  
doch die Schweinscher warn wieder innedrinn, **nun kamen se nimmie raus !!**  
De Lieblingsnochber Herbert hott dann noch schweres Geschütz ufffahre losse,  
unn de Mutter-Sau mit **soim Luftgewehr aus 30 Meter in de Bobbes gschosse !!!**

Die Sau guckt behs zurück und wetzt noch schneller ganz ohne Rast,  
unn befreit sich **wie e Wunner, aussem Grambitter-Schweine-Knascht !!!**

Doch dess eigentliche Highlight in deere friehe Morgenstund,  
hott uffem Schöneberger soim gepflegte Wimbeldon-Rase stattgfunn.  
Die wilden Schweinscher grunzten und rannten schnell weiter ganz froh,  
**doch plötzlich stand im Nachthemd und Hausschuh Miss Rambo dooh !!!**

Die Tierscher ganz verdutzt sinn kreiz un quer herumgesprunge,  
Miss Rambo iss todesmutig mit Sandkaschte-Schippche uffse gesprunge,  
unns Beschte vunn dem Gonze sach ich Eich jetzt unscheniert,  
**moin Bruder Björn hott se lässisch vumm Balkon aus dirischiert !!!!**

## Schluss Kerweredd 2008

Nooch so viel Geschichte s´war alles nett geloge,  
na ja so manches hab ich halt grad geboge,  
S´gab jo Einisches Schlechtes und Negatives zu berichte,  
awwer gonz ehrlich, s´war doch viel Spass bei denne Gschichte,  
hier zu lewe iss doch werklich nett schlecht,  
ich sach Eich was, unn dess iss echt:

**hab ich ershd auswärts moin Traumprinze gfunne,  
werrd ich ball wieder häm noch Weiddedahl kumme !!**

Vorbei iss die Kerweredd, ich hoff s´hott Eich gefalle,  
e Gruss an moi Ghostrider, ich dank Euch Alle,  
Jetzt muss ich wieder e Johr long warte, ferr mich e Qual,  
**die Gläser hoch: Uff unser geliebtes (Weiddedahl) !!**